



Sambanwá

GIYA SA PAGSAMBA KAN BANWAAN NIN DIOS

SOLEMNIDAD KAN BANAL NA HAWAK ASIN DUGO NI CRISTO (CORPUS CHRISTI)
06 JUNIO 2021 • TAON B • PUTI

RITO SA PAGPOÓN

Pataratara

C — “An Buhay sa kaibahan ni Cristo”

Sa nagkapirang mga mauswag na nasyon bakong problema an kakanon asin tubig. Alagad ini an problema kan kadakul na tawo sa manlaen-laen na parte kan kinaban. Dakul an nagugutom. Para sainda an kakanon asin tubig iyo an simbolo nin buhay alagad an kakulangan kaini nangangahulugan nin kagadanan. Ngonian na Solemnidad kan Hawak ni Cristo pinapasabot na mas mahalaga an pangangaipo kan kalag kisa kan hawak. Binoót ni Cristo na iheras an saiyang sadiri tangani huli saiyang magkaigwa nin kapanoan an buhay. Kaipuhan niatong mag-ako nin Banal na Comunion tanganing magdanay sa Cristianong pagkabuhay.

Antifona sa Paglaog

(Cf. S 80, 17)

(Sinambit kun mayo nin Awit sa Paglaog)

Pinakakan sinda hale sa nâgong nin trigo, asin nabasog sinda hale sa gapo nin anirà.

Pagpangurus asin

Pagtaong-galang (Tindog)

P — Sa ngaran kan Ama, asin kan Aki, asin kan Espiritu Santo.

B — Amen.

P — An Kagurangnan mapa-saindo.

B — Asin sa saimong espiritu.

Gawe nin Pagsolsol

P — Mga tugang, akoon ta an satong mga kasâlan, tanganing magkanigo kitang magcelebrar kan mga banal na misterio.

Gabos — Nagkukumpisal ako sa Dios na makakamhan, asin saindo, mga tugang, ta nagkasalà ako nin makuri sa isip, sa tataramon, sa gibo, asin sa kapabayaan: salà ko, salà ko, makuring salà ko. Kaya nangangadyi ako ki Santa Maria, danay na Virgen, sa gabos na Angeles asin Santos, asin saindo, mga tugang, na ako ipamibi sa Kagurangnan tang Dios.

P — Maherak man lugod satô an Dios na makakamhan asin, pakapatawada an satong mga kasâlan, darahon kita sa buhay na daing kasagkoran.

B — Amen.

Kagurangnan, maherak ka

P — Kagurangnan, maherak ka.

B — Kagurangnan, maherak ka.

P — Cristo, maherak ka.

B — Cristo, maherak ka.

P — Kagurangnan, maherak ka.

B — Kagurangnan, maherak ka.

Kamurawayan

Gabos — Kamurawayan sa Dios sa kaitaasan asin sa dagâ katoninongan sa mga tawong marahay an boót. Inoomaw mi ika, rinorokyaw mi ika, sinasamba mi ika, pinapamuraway mi ika, pinapasalamatan mi ika huli kan dakula mong kamurawayan, Kagurangnan na Dios, Hadeng langitnon, Dios Amang makakamhan. Kagurangnan Aking Bogtong, Jesu Cristo, Kagurangnan na Dios, Cordero kan Dios, Aki kan Ama, ika na nagpaparà kan mga kasâlan kan kinaban, kaheraki kami; ika na nagpaparà kan mga kasâlan kan kinaban, akoa an samong pakimaherak; ika na nagtutukaw sa too kan Ama, kaheraki kami. Ta ika sana an Banal, ika sana an Kagurangnan, ika sana an Orog Kahalangkaw, Jesu Cristo, kaiba kan Espiritu Santo: sa kamurawayan kan Dios Ama. Amen.

Colecta

P — Mamibi kita.

O Dios, na sa makangangalas na sacramento, nagwalat ka samo nin pagromdom kan saimong pasion, warasan, namimibi kami, na sa siring na paggalang kan mga banal na misterio kan saimong Hawak asin Dugo, padagos ming mamatean samo an bunga kan pagtubod saimo. Ika na nabubuhay asin naghahade, kaiba kan Dios Ama, kasarô kan Espiritu Santo, Dios, sa gabos na kapanahonan kan mga panahon. **B** — Amen.

LITURGIA KAN TATARAMON

Enot na Babasahon (Tukaw)

(Exodo 24, 3-8)

Kan enot na panahon, an kasundoan o pakikipagtipan ginigibo sa paagi nin pagsacrificio nin hayop asin pagwirik kan dugo kaini. Sa enot na babasahon madadangog niato na an Tipan nin Dios sa banwaan nin Israel nahimo sa siring na paagi. Ini nagpapagiromdom man sato kan Dugo ni Cristo.

Pagbasa sa Libro nin Exodo

Sinabi ni Moises sa banwaan an gabos na tugon asin gabos na pagboót nin Kagurangnan. An bilog na banwaan durungan na nagsimbag: “Kukuyogon mi an gabos na ipinagboót nin Kagurangnan.” Dangan sinurat ni Moises an gabos na tugon nin Kagurangnan. Kan masunod na aldaw, pagka-aga, nagpagibo siya nin altar sa poon kan bulod; nagpatindog nin doceng gapo para sa doceng tribo nin Israel. Dangan nagkapirang mga aking Israelita tinugon na magdolot nin atang asin magbunô nin mga toro na dolot sa Kagurangnan bilang atang nin katoninongan. An kabanga kan dugo kinua ni Moises asin ibinugtak sa palanggana asin an kabanga iwiniirik sa altar. Kinua an Libro; binasa sa mga tawong naghihinanyog asin an mga tawo nagsabi: “Kukuyogon mi an gabos na ipinagboót nin Kagurangnan; kukuyogon mi. Dangan kinua ni Moises an dugo asin iwiniirik. Sabi niya: Ini an dugo kan Tipan na ginibo nin Dios sa saindo: yaon diyan an gabos na kukuyogon nindo.”

Tataramon kan Kagurangnan.

Gabos — Salamat sa Dios.

Salmo Responsorio

(Salmo 115, 12-13. 15-16. 17-18)

S — litaas ko an caliz nin kaligtasan: aapodon ko an ngaran nin Kagurangnan.

1. Paano ko mababalosan an Kagurangnan, huli kan saiyang pagkamarahayon para sako? Idodolot ko an caliz nin

- kaligtasan; aapodon ko an ngaran nin Kagurangnan. (S)
- Magayon sa mata nin Kagurangnan. An kagadanan nin mga maimbod saiya. Surogoon mo ako Kagurangnan, surogoon mo; hinubad mo an mga nakagapos sako. (S)
 - Atang nin pasalamat idinolot ko. An ngaran nin Kagurangnan aapodon ko. Mga panuga ko sa Kagurangnan sakong uutobon sa atubang nin bilog na banwaan. (S)

Ikaduwang Babasahon

(Hebreo 9, 11-15)

Si Jesus iyo an pinakahalangkaw na Padi na nagdolot nin atang sa Dios para sa banwaan. Alagad an dugong pinabulos niya bakong dugon in hayop kundi an saiyang sadiring dugo. Sa paagi kan dugo ni Cristo, nahimo an Bâgong Tipan nin Dios asin tawo.

Pagbasa sa Surat sa mga Hebreo

Alagad ngonian duminatong na si Cristo, bilang halangkaw na padi nin mga karahayan na maabot. Nag-agi siya sa orog na dakula asin orog karahay na tabernaculo, na bakong gibo kan kamot nin tawo, na bakong gibo sa kinaban na ini. Siya luminaog sa santuario, makasarô asin sagkod pa man; dara bakong dugo nin kanding asin mga torong ogbon, kundi an saiyang sadiring dugo; nakamtan para sa sato an kaligtasan na daing kasagkoran. Kun an dugo nin mga kanding asin mga toro nakakapabanal kan saindang hawak: orog na an dugo na idinolot makakalinig kan satong puso sa mga gibong gadan, tanganing kita makapagsamba sa Dios na buhay. Kaya, siya an tagapag-ultanan kan Bâgong Tipan, tanganing an mga tawo na inapod para sa pamana na daing kasagkoran magkamit kan panuga: an saiyang kahadean nangyari tanganing patawadon an mga kasâlan na nalapas kan enot na tipan.

Tataramon kan Kagurangnan.

Gabos — Salamat sa Dios.

Pagrokyaw

(Cf. Juan 6, 51-52) (Tindog)
(Sinasantib kun dai inaawit an Alleluia)

Alleluia, alleluia! Ako an buhay na tinapay na naghilig hale sa langit, olay nin Kagurangnan. An minakakan kan tinapay na ini mabubuhay sagkod pa man. Alleluia, alleluia!

Evangelio

(Marcos 14, 12-16, 22-26)

An pagkagadan nin Kagurangnan duman sa cruz, sarong sacrificio na satuyang ginigiromdom sa lambang pagcelebrar niato kan Banal na Misa. An Evangelio nagpapahayag kan huring pamanggi kan Kagurangnan kun saen tinogdas an sacramento nin Eucaristia. Kita gabos inaalok na makipagbangkete asin makiheras sa diosnon na kakanon na itinatao ni Cristo sa laog kan Eucaristia.

P — An Kagurangnan mapasaindo.

B — Asin sa saimong espiritu.

P — ✠ Pagbasa kan Evangelio susog ki San Marcos.

B — Kamurawayan saimo, Kagurangnan.

Enot na aldaw kan tinapay na Daing Levadura, an aldaw na an cordero pascual inaatang, an mga disipulos nagsabi ki Jesus: “Saen mo gusto kami mag-andam kan pamanggihan sa pasko?” Duwang disipulos sinugo ni Jesus asin sinabihan: “Paduman kamo sa banwá asin masasabat nindo an sarong lalake na may darang dulay nin tubig; sunoda nindo asin paglaog sa harong, sabihon nindo sa kagharong: ‘Nagpapahapot an Maestro kun saen siya makakan kan cordero pascual kaiba an saiyang mga disipulos.’ Ipapahiling saindo an dakulang sala sa itaas, sangkap asin andam na. Dangan kamo mag-andam kan pasko para sa sato.” An mga disipulos nagduman, naka-abot sa banwá, nakua an gabos, siring sa sinabi sainda, asin duman nag-andam kan pamanggi sa pasko. Mantang sinda nagkakakan; kinua ni Jesus an tinapay, benendicionan, binaak, itinao sainda asin gabos nag-inom. “Akoa nindo: ini an sakuyang hawak.” Dangan kinua an caliz: nagpasalamat, itinao sainda asin gabos nag-inom. “Akoa nindo: ini an sakuyang dugo, dugo sa bâgong tipan, dugo na papabuloson para sa gabos. Totoong sinasabi ko saindo: dai na ako mainom kan bunga nin ubas sagkod sa aldaw na ako mag-inom nin bâgong arak sa kahadean nin Dios.” Nag-awit nin mga salmos, dangan nagluwas pasiring sa bukid nin mga olivos.

P — Marahay na Baretá kan Kagurangnan.

B — Pag-omaw saimo Cristo.

Homilia (Tukaw)

Pagrokyaw kan Pagtubod (Tindog)

Credo Niceno-Constantinopolitano

Gabos — Nagtutubod ako sa sarong Dios Amang makakamhan, kaggibo kan langit asin dagâ, kan gabos na nahihiling asin dai nahihiling. Asin sa sarong Kagurangnan na si Jesu Cristo, Bogtong na Aki kan Dios, asin namundag gikan sa Ama bagô kan gabos na panahon. Dios na gikan sa Dios, ilaw na gikan sa ilaw, totoong Dios na gikan sa totoong Dios, ipinangaki, dai linalang, saro sa pagka-Dios sa Ama: huli saiya nagkaigwa kan gabos. Huli sa satong mga tawo asin huli sa satong kaligtasan naghilig siya hale sa kalangitan.

(Sa mga minasunod na tataramon, abot sa asin nani-tawo, an gabos minaduko.)

Asin nani-laman huli kan Espiritu Santo ki Virgen Maria, asin nani-tawo. Ipinako pa sa cruz para satô kan panahon ni Poncio Pilato; nagtios sagkod sa kagadanan asin ilinobong, asin kan ikatolong aldaw nabuhay-liwat susog sa mga kasuratan, asin suminakat sa langit, nagtutukaw sa too kan Ama. Asin mamuraway na mabalik, sa paghukom sa mga buhay asin mga gadan, an saiyang kahadean daeng katapusan. Asin sa Espiritu Santo, Kagurangnan asin kagtao nin buhay: na gikan sa Ama asin sa Aki. Siya kaiba kan Ama asin kan Aki, sabay na sinasamba asin pinapamuraway: siya nagtaram sa paagi nin mga profetas. Asin sa sarô, banal, catolico asin apostolicong Simbahan. Nagpapahayag ako nin pagtubod sa sarong bonyag, sa pagpatawad nin mga kasâlan. Asin naghahalat ako kan pagkabuhay-liwat nin mga gadan, asin kan buhay sa maabot na panahon. Amen.

Pamibi nin Banwaan

P — Mantang nagsecelebrar kita kan solemnidad kan banal na Hawak asin Dugo ki Cristo, may pagsarig kitang madolok sa Ama sa pagdolot kan satuyang mga kahagadan saiya.

S — Kagurangnan, hinanyoga an samong pamibi.

- Tanganing an Simbahan sa bilog na kinaban padagos na magtalubo sa pagpahalaga kan Eucaristia bilang Tinapay nin Buhay sa pagcelebrar kan sacrificio sa Santa Misa panô nin pakasabot asin kalodokan, ipamibi niato sa Kagurangnan. (S)

2. Tanganing an mga pinabasog kan Hawak asin Dugo ni Cristo magin mga kasangkapan sa pagpalakop kan pagkamoot, katanosan asin katoninongan sa satuyang mga comunidad, ipamibi niato sa Kagurangnan. (S)
3. Tanganing bendicionan an mga kaakian na nag-aandam sa enot na pag-ako kan Hawak ni Cristo, ipamibi niato sa Kagurangnan. (S)
4. Tanganing an nagsasakit na hawak kan mga naghehelang rangahon kan Dios asin paomayan an kakundian kan saindang espiritu, ipamibi niato sa Kagurangnan. (S)
5. Tanganing an mga gadan magogma sa buhay na daing kasagkoran sa langit, ipamibi niato sa Kagurangnan. (S)

P — Langitnon na Ama tinawan mo kami kan Hawak asin Dugo kan saimong Aki bilang kakanon asin inomon sa samuyang paglakbay. Warasan na sa pakisumarô niamo saiya, magkasararô an gabos na miembro kan saiya hawak. Siya na nabubuhay asin naghahade sa kapanahonan kan mga panahon.

B — Amen.

LITURGIA KAN EUCARISTIA

Pagdolot (*Tukaw*)

(*Sinasambit kun mayong Awit sa Pagdolot*)

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin tinapay, na idinodolot mi saimo bunga kan dagâ asin kan gibo kan mga kamot nin mga tawo, ini magigin para samo tinapay nin buhay.

B — **Pag-omawon an Dios sagkod pa man.**

P — Inoomaw ka, Kagurangnan, Dios nin gabos na linalang, huli ta sa saimong pagka-matinao nag-ako kami nin arak, na idinodolot mi saimo bunga kan balagon asin kan gibo kan mga kamot nin mga tawo, ini magigin para samo inomon nin kalag.

B — **Pag-omawon an Dios sagkod pa man.**

P — (*Tindog*) Magpamibi kamo, mga tugang: tanganing an sako asin an saindong atang maako man lugod kan Dios Amang makakamhan.

B — **Akoon man lugod kan Kagurangnan an atang sa saimong mga kamot para sa kaomawan asin kamurawayan kan saiya ngaran, para man sa pakinabang niato asin kan bilog niyang banal na Simbahan.**

Pamibi sa mga Dolot

P — Kagurangnan, namimibi kami, kaheraking warasan sa saimong Simbahan an mga dolot nin pagkasararô asin katoninongan, na makangangalas na ipinapahayag kan mga idinolot na atang. Huli ki Cristo samong Kagurangnan.

B — Amen.

Prefacio

An Sacrificio asin Sacramento ni Cristo

P — An Kagurangnan mapasaindo.

B — **Asin sa saimong Espiritu.**

P — litaas an mga puso.

B — **Initaas mi na sa Kagurangnan.**

P — Magpasalamat kita sa Kagurangnan, satuyang Dios.

B — **Maninigo asin Dapat.**

Totoong maninigo asin dapat, matanos asin nakakaligtas, na danay asin minsan saen magpasalamat kami saimo: Kagurangnan, banal na Ama, Dios na makakamhan na daing kasagkoran: huli ki Cristo samong Kagurangnan.

Siya an totoo asin daing kasagkoran na Padi: sa pagtogdas kan forma nin danay na sacrificio, enot na nagdolot saimo kan sadiri, victimang nakakaligtas, asin nagtugon samo na magdolot kaini sa pagromdom saiya. Pagkinakakan mi an saiya laman, sacrificio na idinolot para samo, kami napapakusog, asin pag-iniinom mi an Dugo na pinabulos para samo, kami nahuhugasan.

Kaya kaiba kan mga Angeles asin Arcangeles, kaiba kan mga Tronos asin Dominaciones, asin kaiba kan gabos na langitnon na hukbô, nag-aawit kami kan himno kan saimong kamurawayan, daing tapos na nagsasabi:

Gabos — Banal, Banal, Banal an Kagurangnan Dios ni mga hukbô. An langit asin dagâ pano kan Saimong kamurawayan. Hosana sa kaitaasan. Paladan an minadigdi sa ngaran kan Kagurangnan. Hosanna sa kaitaasan.

Pamibi sa Eucaristia (*Luhod*)

P — Misterio kan Pagtubod.

B — **An pagkagadan mo, Kagurangnan, ipinapamareta niamo, an Pagkabuhay mo liwat ipinapahayag, sagkod na ika magdatong.**

P — Huli saiya, asin kaiba niya, asin sa saiya, saimo Dios Amang

makakamhan kasarô kan Espiritu Santo, an gabos na kagalangan asin kamurawayan, sa gabos na kapanahonan kan mga panahon.

B — Amen.

RITO SA PAGCOMUNION

Ama Niamo (*Tindog*)

P — Natukdoan kan mga nakakaligtas na tugon, asin pinatood kan diosnon na kaugalian, nangangahas kitang magsabi:

Gabos — Ama niamo, na yaon sa langit: pabanalon an ngaran mo; magdatong an kahadean mo; mangyari an boót mo sa dagâ nin siring sa langit. An samong kakanon sa aroaldaw itao mo samuya ngonian, asin patawadon mo kami sa samong mga kasâlan, siring na pinapatawad niamo an mga nagkakasalà samuya; asin hare kami pagdaraha sa sugot; kundi agawa kami sa maraot.

P — Agawa kami sa gabos na maraot, namimibi kami Kagurangnan; warasan sa mga aldaw niamo an katoninongan, tanganing kaming natabangan kan saimong pagkaherak magin danay na talingkas sa kasâlan asin man ligtas sa gabos na kapurisawan: mantang kami naghahalat kan maogmang paglaom asin pagdatong kang samong Paraligtas na si Jesu Cristo.

B — **Huli ta saimo an kahadean, asin an kapangyarihan, siring man an kamurawayan sa mga kapanahonan.**

P — Jesu Cristong Kagurangnan, ika na nagsabi sa saimong mga Apostoles:

Katoninongan iwinawalat ko saindo, an sakong katoninongan itinatao ko saindo: hare paghilinga an samong mga kasâlan, kundi an pagtubod kan saimong Simbahan; asin papagkanigoa na siya mapatoninong asin magkaboronyog susog sa saimong kabotan. Ika na nabubuhay asin naghahade sa kapanahonan kan mga panahon.

B — Amen.

Pagpahayag kan Katoninongan

P — An katoninongan kan Kagurangnan danay na mapasaindo.

B — **Asin sa saimong espiritu.**

P — Magpatinaraohan kamo nin katoninongan

Cordero

B — Cordero kan Dios, na nagpaparà kan mga kasâlan kan kinaban: kaheraki kami. Cordero kan Dios, na nagpaparà kan mga kasâlan kan kinaban: kaheraki kami. Cordero kan Dios, na nagpaparà kan mga kasâlan kan kinaban: tawi kami nin katoninongan.

Pag-alok sa Pagcomunion *(Luhod)*

P — Uya an Cordero kan Dios, uya an nagpaparà kan mga kasâlan kan kinaban. Paladan an mga inapod sa pamanggi kan Cordero.

Gabos — Kagurangnan bako akong maninigo na ika magdagos sa sakuyang harong: alagad magtaram ka sana, asin an sakong kalag maomayan.

Antifona sa Comunion

(Jn 6, 57)

(Sinambit kun mayong Awit sa Comunion)

An nagkakan kan sakong laman asin nag-iinom kan sakong dugo, nagdadabay sako asin saiya, olay kan Kagurangnan.

Pamibi

Pakacomunion *(Tindog)*

P — Mamibi kita.

Kagurangnan, namimibi kami, giboha kaming mabasog giraray kan daing-sagkod na bunga kan saimong pagka-Dios, na pinapanino ngonian sa pakisumaro kan mahal mong Hawak asin Dugo. Ika na nabubuhay asin naghahade, sa kapanahonan kan mga panahon.

Marahay na magproesion pakatapos kan Misa, kun saen kino-consagra an hostia na dadarahon sa proesion. Alagad mayong nagpapangalad na an proesion gibohon dawa pakatapos nin halawig asin publicong pagsamba na nagsusunod sa Misa. Kun gigibohon an proesion paka-Misa, pagtapos kan Comunion kan banwaan, an ostensorio na linaogan kan kinonsagrang hostia, ibubugtak sa altar. Pakatapos kan Pamibi Pakacomunion, dai na sinasabi an Rito sa Pagtapos, aandamon na an proesion.



GIYA SA PAGMISA SA SEMANA

Junio 7, Lunes

Lunes sa Ika-Sampunglong Semana kan Ordinariong Panahon, *Verde*

Misa — Propio kan Aldaw, Prefacio Comun I-VI

Mga Babasahon — 2 Cor 1, 1-7 | S 34, 2-3. 4-5. 6-7. 8-9 | Mt 5, 1-12

Junio 8, Martes

Martes sa Ika-Sampunglong Semana kan Ordinariong Panahon, *Verde*

Misa — Propio kan Aldaw, Prefacio Comun I-VI

Mga Babasahon — 2 Cor 1, 18-22 | S 119, 129. 130. 131. 132. 133. 135 | Mt 5, 13-16

Junio 9, Miercoles

Miercoles sa Ika-Sampunglong Semana kan Ordinariong Panahon, *Verde*

o Memorial ni San Efren, Diacono asin Doctor kan Simbahan, Puti

Misa — Propio kan Aldaw, Prefacio Comun I-VI

o hilingon sa Misal Romano sa Bicol: Propio nin mga Santos – p. 142.

Mga Babasahon — 2 Cor 3, 4-11 | S 99, 5. 6. 7. 8. 9 | Mt 5, 17-19

Junio 10, Jueves

Jueves sa Ika-Sampunglong Semana kan Ordinariong Panahon, *Verde*

Misa — Propio kan Aldaw, Prefacio Comun I-VI

Mga Babasahon — 2 Cor 3, 15; 4, 1. 3-6 | S 85, 9. 10. 11-12. 13-14 | Mt 5, 20-26

Junio 11, Viernes

SOLEMNIDAD KAN MAHAL NA PUSO NI JESUS, *Puti*

Misa — Hilingon sa Misal Romano sa Bicol: Mga Solemnidad kan Kagurangnan, pp. 142-144.

(Dai tugot an pagcelebrar kan mga Misa para sa Gadan, alagad pwede an Misa sa Lobong.)

Mga Babasahon — Hos 11, 1. 3-4. 8-9 | Is 12, 2-3. 4. 5-6 | Ef 3, 8-12. 14-19 | Jn 19, 31-37

Junio 8, Sabado

Malinigon na Puso ni Virgen Maria, *Puti*

Misa — Hilingon sa Misal Romano sa Bicol: Propio nin mga Santos – pp. 135-136.

Mga Babasahon — 2 Cor 5, 14-21 | S 103, 1-2. 3-4. 9-10. 11-12 | Lc 2, 41-56



MOST REV. ROLANDO J. TRIA TIRONA, OCD, DD, Arzobispo kan Caceres
REV. FR. LUISITO A. OCCIANO, Direktor, Caceres Commission on Communications
REV. FR. GLENN C. RUIZ, Direktor, Commission on Liturgy
REV. FR. ERIC P. BOBIS, In-Charge, Social Media
JOHN PAUL M. AVEN asin **JUAN CARLOS R. MADRID**, Mga Editor

Hinimo asin inandam kan Archidiocesis nin Caceres, sa pangengenot kan Caceres Commission on Communications asin Commission on Liturgy. Ciudad nin Naga, Pilipinas • 2021

TABANGAN NA MASUSTENIR AN SAMBANWÁ!

Para sa mga donacion, puwedeng magdeposito sa:
Banko asin Branch: **BDO UNIBANK, INC. (BDO) PANGANIBAN DRIVE, NAGA CITY**
Account Name: **CACERES COMMISSION ON COMMUNICATIONS**
Account Number: **008440050319**